

إِنَّ الدِّينَ عِنْدَ اللَّهِ الْإِسْلَامُ




لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khuta Eid-UI-Adha

HADHRAT MUHYI-UD-DIN AL-KHALIFATULLAH

Munir Ahmad Azim

22 Août 2018
(10 Dhul-Hijjah 1439 AH)



Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - et Eid Mubarak, Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba Bakr Eid lor « **Sacrifice 'Qurbani' & Hajj** »:

SACRIFICE « QURBANI » ET HAJJ

Sak religion ena certains rituels. Et sa bane rituels là li couma bane parures ki transformer et zot vine le visage même de la religion. Li important pou valorise sa bane rituels là afin ki nous bien situer nous dans la religion. L'Islam li ene religion ki ena seulement deux

fêtes dans ene l'année ki fêté rituellement et donc zot ena ene l'importance religieux plisse ki bane les autres, et sa deux fêtes là c'est : *Eid-ul-Fitr* et *Eid-ul-Adha*.

À noter ki sa deux fêtes là ena dans sakaine ene la prière (*Namaz/ Salaat*) spéciale. Au fait, avant l'arrivée de Rassoollullah (saws) à Madina, so bane habitants ti pé célébrer deux les autres fêtes dans deux différents jours de l'année. Kan le Prophète d'Allah (saws) ti arrive là-bas, li fine déclaré : « *Zot ti ena deux jours d'amusement. Mais astaire là, Allah (swt) fine remplace sa par deux les autres jours ki pli meilleurs : Eid-ul-Fitr et Eid-ul-Adha.* » (Nasai).

Bane jours de Eid zot bane seuls jours de fête de calendrier Islamique. Sa deux jours de fête là contenir sakaine ene *Namaz* spéciale. Donc, ene musulman li gagne pou célébrer so fête avec plisse la prière ek ferveur en remercient so Seigneur pour tous bane faveurs ki Li fine déverse lor li. C'est donc avec ene la prière supplémentaire ki ene musulman exprime so la joie tout en remerciant so Créateur.

Et, à l'occasion de *Eid-ul-Adha*, c'est avec le sacrifice d'ene zanimal au nom d'Allah ki li remercie so Seigneur et li faire preuve de générosité envers bane démunis.

Le terme « **Qurbani** » li dérivé du mot « *Al-Qurban* » ki veut dire tout travail/ action ki amène ene dimoune pou rapproche li avec Allah. C'est pourquoi ki tout bane services religieux appelle zot '*Qurbah*' ou, bane moyens pou faire bane travaux saints et plus particulièrement bane sacrifices.

Le Saint Prophète (saws) fine rapporté ki nous *Rab* (Allah) fine déclaré : « *Mo serviteur li approche li sans cesse avec Moi en accomplissant bane actes supplémentaires de dévotion ziska séki Mo accorde li Mo affection. De ce fait, Mo vine so z'oreille par quoi li tender, so lizié avec quoi li trouver... Et si li demande Moi kitchose, Mo pou accorde li sa, et si li cherche Mo protection, Mo pou protège li.* » (Bukhari).

Sa jour de *Eid-ul-Adha* là amène nous pou réfléchi lor bane sacrifices ki Hazrat Ibrahim (as) ti offert à so *Rab* : bane épreuves d'émigration, le fait ki bane l'ennemis fine jette li dans difé et kot li fine aussi séparé avec so famille, parmi tant d'autres, et encore, Allah (swt) ti ordonne li pou sacrifier so garçon Hazrat

Ismaël (as). Li fine soumette li à la volonté divine et fine place couteau lor licou so garçon pour égorge li.

Mais ensuite Allah (swt) fine décrété pou épargne Hazrat Ismaël (as) de sa sacrifice humain là et fine plutôt remplace sa sacrifice là par sacrifice ene mouton. Au fait, Allah (swt) fine oulé combler bane musulmans de bane bienfaits par rapport à zot bane confrères Chrétiens et Juifs, mais pour sa, ti ena avant tout sa commandement pou sacrifier Ismaël (as), ki li le papa-ascendant (ancêtre biologique) du Saint Prophète (saws). Le Saint Prophète (saws) fine dire : « *Mo garçon de deux dimounes ki fine sacrifier (ki fine être donner en sacrifice).* » (Mustadrak Hakim). Ismaël (as), garçon aîné de Hazrat Ibrahim (as) et papa de bane Arabes, et Abdullah, le père biologique du Saint Prophète (saws). Tous les deux ti lor le point pou être sacrifié (et kot zot fine sapé à temps par l'ordre divine).

C'est pour faire revivre la mémoire de l'esprit de sacrifice de Hazrat Ibrahim (as) ki nous, bane musulmans, nous être appelé sak l'année pou sacrifier bane zaimo (bane bétaaye) pendant bane jours de *Eid-ul-Adha*. Le sacrifice de bane zaimo pendant 10^{ème} Dhul-Hijjah li ene symbole intégrant de l'Islam. Allah (swt) fine déclaré : « **Nous fine désigne bane chameaux (et bétaaye) bien portants pour certains rites sacré pour Allah.** » (Al-Hajj 22 : 37).

Hazrat Aisha (ra) rapporté ki le Saint Prophète (saws) fine dire : « *Le jour d'Eid-ul-Adha pas ena ene lotte action ki pli plaire à Allah (swt) ki verse di sang (d'ene zaimo).* » (Tirmidhi).

Le *Qurbani* ou *Udhiya* li obligatoire lor sak musulman ki ena les moyens, de par le verset du Quran Shareef dans Surah Al-Kawthar : « **Faire la prière (Salaat) et sacrifice pour to Maître.** » (Al-Kawthar 108 : 3).

Ena plusieurs nuances et interprétations à sa verset là. D'après sa verset là, fine aussi mentionné ki l'ordre du *Qurbani* li obligatoire, pareil couma *Salaat*. Au fait, séquence de *Salaat* de *Eid-ul-Adha*, ensuite alle faire le sacrifice d'ene zaimo fine être expliqué par le Saint Prophète (saws) : « *Aujourd'hui le premier rite pou Namaz. Ensuite, nous pou retourne accomplir Qurbani. Celui ki suive sa séquence là fine vraiment suive nous Sunna. Celui ki fine égorge so zaimo avant Namaz, alor sa li pas Qurbani, mais seulement la viande pour so famille.* » (Bukhari).

Fine rapporté d'ene Hadith authentique de Ibn Majah ki Hazrat Abu Huraira (ra) fine dire ki le Saint Prophète (saws) fine dire : « *Celui ki ena les moyens et ki li pas fine prend bane dispositions pour accomplir le Qurbani, alors faudré pas li approche li de [nous] Musalla (c'est-à-dire, faudé pas li vine faire Namaz Eid ensam avec nous).* »

Donc l'obligation du *Qurbani* li ena même l'envergure, même l'importance ki *Salaat/ Namaz*. Sak dimoune ki ena les moyens bizin impérativement prend (c'est-à-dire, offert) ene part *Qurbani*. Aussi, fine rapporté par Bukhari ki ene *Sahabi*, Hazrat Abu Burdah (ra) fine pose question à Nabi Kareem (saws) ki li ti fine alle fini sacrifier so zaimo avant *Namaz*. Alors le Saint Prophète (saws) fine ordonne li pou refaire le *Qurbani*. Donc le *Qurbani* li *Wajib*, obligatoire lor sak membre de la famille ki pas bane voyageurs – ki pas pé voyager, ki fine arrive l'âge de puberté et ki ena les moyens pou prend part *Qurbani*. Fine rapporté de Mustadrak Hakim ki le Saint Prophète (saws) ti recommande so tifille Fatima pou diboute pou assister, pou témoigne de so *Qurbani*. Le Saint Prophète (saws) ti faire *Qurbani* d'ene vache en entier pou Hazrat Aisha (as). (Muslim).

Pour sa jour de *Eid-ul-Adha* là, sa faire moi la peine ki beaucoup d'entre bane amoureux de Hazrat Muhammad (saws), bane amoureux d'Allah, pas pé capave alle faire Hajj dans Makkah. La maison d'Allah li pas propriété de personne. D'après la loi de l'homme tous bane ki croire dans le Messie Promis Hazrat Mirza Ghulam Ahmad (as) zot bane non-musulmans et zot pas autorisé pou accomplir le Hajj dans Makkah. D'après zot, nous présence dans Makkah et Madina, pour le Hajj et *Umrah* pou soi-disant ene insulte ki nous faire dans sa bane places, sa bane sanctuaires religieux là.

À Maurice, ene ti l'île de l'Océan Indien, pour alle faire Hajj, bizin rempli ene forme ki par la suite bizin signé par ene Imam pour conner ki Jamaat zot appartenir, et c'est ene conseil ki mo pé donne à tous bane frères et sœurs pour ki zamaiz zot alle cause menti et renonce à zot la foi concernant la véracité du Messie Promis Hazrat Mirza Ghulam Ahmad (as) pour accomplir le 5^{ème} pilier de l'Islam. Laisse sa bane dimoune ki soi-disant bane grands défenseurs de l'Islam prend lor zot z'épaules sa péché pou empêche bane serviteurs d'Allah pou accompli le cinquième pilier de l'Islam. Li malheureux kan ou trouve sa bane soi-disant défenseurs de l'Islam là agir dans ene façon non-Islamique. Alors ici à

Maurice zot formes passe dans ene comité ki siégé par bane soi-disant Mullahs dans Centre Islamique pour guetter si pas intel intel zot croire et suivre Hazrat Massih Ma'oud (as), et si c'est le cas, alor zot formes et zot application visa pour Makkah pou rejeter et sa même stratégie là zot appliquer dans tous bane pays du monde entier.

Donc, Ô bane amoureux d'Allah et de Hazrat Muhammad (saws), zot ki fine étudié l'unicité d'Allah dépi le Saint Prophète (saws), zot ki fine apprane de Hazrat Muhammad (saws) bane attributs d'Allah, zot ki fine apprane l'exercice de la spiritualité à travers li, mo capave rassure zot et mo fer serment ki aussi longtemps ki zot pou être interdit l'accès pour le Hajj dans Makkah au nom d'Allah par crainte de bane reprézaaye (répercussions), zot Hajj pou accepté, pou accepté et pou certainement accepté.

De ce fait, Ô bane Hajjis ki pas capave faire le déplacement pour le Hajj, mo faire zot mo compliments et mo félicite zot. Mo souhaite zot mo bane meilleures vœux pour sa fête de *Eid-ul-Adha* aussi et mo bane compliments à mo bane disciples ki trouve à travers le monde, spécialement mo bane disciples de Kerala, Tamil Nadu, Delhi, Chennai, Abu Dhabi, Dubaï, Comores, Mayotte, Malaisie, Indonésie, Réunion, Madagascar etc.

Mo annonce zot sa bon nouvelle là ; mo pé transmette zot sa nouvelle là ki Allah fine ouvert pour nous bane chemins du ciel et très bientôt la décision d'Allah pou prend le dessus lor tous bane plans ki l'homme fine faire dans sa lé monde là. Zot pou recevoir la permission par la grâce divine, pou accompli zot désir le plus cher pou alle Makkah pour zot Hajj, lé cœur rempli d'amour pou Allah et pour le Saint Prophète (saws).

La question ki nous bizin poser li comme suite : **Couma nous capave distingue ene vrai musulman d'ene ki fausse, couma eski nous capave reconnaître ene ki authentique, ki vrai et sincère de celui ki musulman que de nom selon la foi et pratique Islamiques ?**

Celui ki bizin décide de sa c'est seulement Allah, nous Maître et seul Juge. Tout saki touche la foi, ki concerne ene dimoune so *Imaan* et religion li entre sa dimoune là et so Créateur, Allah (swt). Couma ene être humain, nous absolument pas ena aucaine pouvoir et aucaine droit pou décide pour les autres, pou

déterminer ki la foi intel et intel bizin ena. Nous pas ena sa droit là pou juge la foi les autres. Nous pas gagne aucaine tracas sipa, *'Ah ! Pé colle étiquette de non-musulman lor nous !'* Non, pou pas ena sa kalité frayeur là, par la grâce d'Allah. Si dans lizié d'Allah, nous bane musulmans, alor sa li suffi pour nous. Nous pas bizin kit attestation d'ene quelconque Gouvernement ou d'ene assemblée pour dicter nous lor là.

Ka'aba Shareef li premier la Caze ki fine construire pour l'adoration d'Allah, ene la Caze ki fine construire pour tous bane dimounes sans distinction de religion, de couleur et de races. Li ene la Caze pour l'adoration du Dieu Unique et tous bane dimounes ena ene droit lor là, surtout bane ki reconnaite l'unicité d'Allah. Li ene la Caze béni kot bane dimounes tire bane innombrables bénéfiques et ki dédié à l'humanité pour so guidance et la paix de so l'âme. Bane ki dans la capacité pou faire li, bizin aller, et accomplir Hajj au nom de nous *Rab*. Sa c'est injonction ki Quran Shareef fine commander à bane fidèles de l'Islam. Azordi nous trouve nous exclu de sa pratique, de sa cinquième pilier de l'Islam là. La question ki posé donc c'est : Depuis kan Allah (swt) fine rejette So bane propres injonctions, ki permette l'accès de Ka'aba Shareef à tous bane dimounes sans distinction, et ki sanlà donc fine gagne le toupé pou prend lor li-même sa privilège ki zis Allah ena là pou juge la foi dimoune et pou empêche So bane serviteurs pou rentre dans l'enceinte sacré de Ka'aba Shareef pour le Hajj ? Ki zot été zot pou décider ki sanlà parmi bane dimounes dans sa le monde là capave faire Hajj ou non ? Ka'aba Shareef li la maison d'Allah et non la propriété de qui que ce soit.

Verset 115 de Surah Al-Baqara et le Verset 19 de Surah At-Tauba de Quran Shareef cause respectivement de Ka'aba Shareef en sa bane termes là :

« Ki faire pli grand ditort ki dimoune ki empêche rappeler nom Allah dans mosquées, et ki faire ene zeffort pou ruine mosquées là ? Bane dimounes coumsa là, c'est seulement avec frayeur ki zot ti capave rentre dans mosquée. Pou zot ena déshonneur lor la terre, et ene grand punition dans la vie future (après la mort). » (Al-Baqara 2 : 115).

« Eski ou considère ki donne de l'eau à bane *Hajjis* ou bien entretenir Mosquée Sacré (*Haram Shareef*) pareil couma gagne la foi en Allah et le dernier jour et faire la guerre pou cause Allah ? Sa deux choses là pas pareil dans lizié d'Allah, et Allah pas guide dimounes ki faire du tort. » (At-Tauba 9 : 19).

Fine arrive l'heure ki ou faire ene l'examen de ou conscience à la lumière de bane l'enseignements du Quran Shareef et de bane Hadiths. Si ou reste zis ene sel bote de la lumière au plus profond de ou l'âme, ou pou comprend peut-être alors ki sanlà ene vrai musulman et ki sanlà li musulman zis en apparence.

Si zot continuer interdire nous le Hajj kot la Caze d'Allah et si zot persister pou suivre le chemin tracé par bane l'ennemis du Saint Prophète (saws), kot zot senti zot bien content et satisfait et fiers de zot bane actions, alor nous, nous pou prend patience lor sa situation là parski en vrai dire c'est zot ki malheureux dans tous sa, pas nous. Quant à nous, Allah et So prophète suffit pou nous. Interdit nous autant ki zot ouler, mais l'amour ki nous ena pour Allah, pour So Messenger (saws), pour Makkah et Madina, sa zamais zot pas pou capave enlève de nous les cœurs. Nous complètement imbu de sa l'amour là. Et nous confiant ki le jour pou arriver kan tous sa bane interdictions là pou enlevé et ki nous pou les bienvenus dans Makkah. *Insha-Allah. Ameen.*